

Gui'ch par ree b́en Hebreos

Ma gunee Xi'n Dios xtiidx xDadaman

1 Tiamp gulal, Dios guneenē ree dux b́engulal ree zien volt nē gadxagayaa mod por ree b́en badēē xtiidx Dios loj ree bejn, ²per yan ma guneenēman dunuj ree por Xi'nman. Dios been gra ni yu' xanyabaa nē loj guidxliuj por Xi'nman. Abi' gra basa'n loj Xi'nman. ³Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por guialrniabee ni rajpaman.

**Xi'n Dios naj mazri b́en
zobjloj guial loj ree anjl**

⁴Zianan zeel laaman naj mazri b́en zobjloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios b́en rajp gra guialrniabee ⁵Din ad yu't dxej rēb Dios loj ree anjl:

Lūj naj da xi'nan,
abi' diizd yan gulūn guial lūj naj
da xi'nan.

Achut tēēt loj anjl rēbaman:

Naj gac xdadil, abi' lūj gac da
xi'nan.

⁶Per chi guxhaal Dios Xi'nman loj guidxliuj, Xi'nman b́en rajp guialrniabee zi'cgajc laaman, dxel rēbaman:

Gra ree da anjlan,
gol guyēn da Xi'nan, gol gojp
tēēman respejt.

⁷Abi' chi gunee Dios por ree anjl, rēbaman:

Naj rūn ree da anjlan zi'c bi, rūn
tēēn laa reeman zi'c bajl.

⁸Per por Xi'nman rēbaman:
Dad Dios, xguialrniabeel naj par
tiblayaa,
abi' guidib tiamp nabeel zi'c
rayal.

⁹Lūj ruladxil ni naj zagdxe
abi' rdxe'chil ni mal.
Zeel Dios b́en naj xDiosil
baneeman lūj mazri guial rabaa
guial loj gra ree b́en za'nēl.

¹⁰Rēb tēēman:
Dad, diizd yalox lūj been
guidxliuj nē xanyabaa
con gra ni yu' loj reen.

¹¹Gra reen yu' dxej nit reen,
per lūj ma nabanl tiblayaa.
Gra reen yayox zi'c tijb lajd,

¹²gusie'til laa reen zi'c rusie't bejn
xabaman,
abi' zuchaal laa reen zi'c ruchaa
bejn xabaman,

per ĺij ad yu't dxej guidxaa zi'c
najl

abi' zianczi gapil guialnaban.

¹³Ad yu't dxej ŕeb Dios loj tijb ree
xianjlamán:

Gurej da ladbeen xt ǵunan gan
nabeel b́en rdxe'ch ree ĺij.

¹⁴Din gra ree anjl naj sprijt caýujn
ree sirv loj Dios, abi' rxhiaalaman
laa reeman din ǵuún reeman yudar
b́en ni gap ree guialnaban tiblyaa
delant loj Dios.

Ad yasa'n ree diidx ni
yab́eé dunuj ree loj dol

2 Zeel ŕijn naguiejn yayidxga'
ree xtiidx Dios ni ma
bacaagdiajg ree chit́eé yasa'n ree
xnejzaman ni ma zunaal ree. ²Din
zi'c goc cumplid gra xtiidx Dios
ni gunee ree anjl diizd gocli, b́en
ad bazoobt diidx, b́en been ree
dol, laa reeman bayal casti ni rayal
reeman. ³¿Xhieza naag laa ree loj
casti bal ńe dunuj ree ad zayidxga't
xtiidx Dios ni rugojn dunuj ree par
yayajc ree perdon? Awa laagajc Dad
Jesucrist bagojn xcwent perdon
guin diizd yalój, abi' ree b́en
biguiejn laan, laa reeman bagojn
dunuj ree. ⁴Yan zi'c ma cwa' bejn
guialrignia' rent guialrignia' ren
por xSprijt Dios zi'c naj xixgabaman,
abi' por ree sen ńe ree milagr con
los demazri ree ni radxalój bejn,
zian ma baĺüü Dios guial ni diidxli
naj ree diidx guin.

Jesucrist rab́eé bejn loj dol

⁵Dios ad bad́eétaman
guialrniabee loj ree xianjlamán
par nabee reeman lod yaya'p ree
guialnaban cúb ni cayza't ree, ⁶din

yu' tiblajt loj xtiidx Dios lod ŕeb
bejn:

Dios, ¿chu naj b́enguidxliuj zeel
rusaaladxil laaman?

¿Chu naj xi'n b́enguidxliuj zeel
ŕujnl xgab por laaman?

⁷Guyu tijb tiamp ni baletil xi
valoraman guial loj ree anjl.

Per despuejs ma beenl laaman
b́en zojbloj,

bad́eél guialrniabee lojman
din nabeeman gra ree ni
beenchaawil,

⁸abi' gra basa'n'l lojman.

Chi bad́eé Dios guialrniabee lojman
par nabeeman gra, achetczi ni
baya'n ni ad zanabeetaman majsi
dunuj ree sta ad cayguiaat ree guial
nabeeman gra. ⁹Per dunuj ree
rayagbee guial guyu tiamp ni balet
Dios xvalor Jesús guial loj ree anjl.
Yan ma ca'man guialrniabee abi'
rajp bejn laaman respejt por guialzi
ni gudédaman chi ǵütaman por gra
bejn, abi' zian gojc guial ŕen Dios
dunuj ree.

¹⁰Por Dios yu' gra, abi' laaman
rniabee gra ni yu', abi' ŕenman chu'
zien ree xi'nman xanyabaa. Zeel por
guialzi ni gudéd Jesucrist bayaalój
bazoobaman xtiidx Dios, abi' tijbzi
por laaman ma zajc yaya'p ree
perdon. ¹¹B́en ma naya ree delant
loj Dios, por Jesucrist naya reeman.
Abi' tant Jesucrist tant ree b́en ma
naya por laaman, tijbzi Dios naj
xdad reeman. Zeel ad ratut Jesucrist
ŕebaman loj reeman: Da bichan.

¹²Zi'c ca tib lajt loj xtiidx Dios lod ŕeb:

Ǵun diidx loj ree da bichan
xcwentil,

abi' chi yadxaag lasa' reeman
golan

cant ree ni guza't ĺuj zagdxe.

¹³Ŕeb t́eeman:

Tijbzi Dios yu'guican gagńe naj;
abi' ŕebaman:

Laa naj guie con ree da xi'nan
xin bazaladx Dios naj.

¹⁴Abi' zi'c b́enguidxliuj tibloj
najman rejn con b́eel, ziangajc
gojc Jesucrist chi bi'taman loj
guidxliuj persi gojc ǵujtaman, abi'
por xguialǵujtaman beenman gan
loj guialrniabee ni gop xindxab
loj guialǵujt. ¹⁵Zian beenman
persi bab́eeman bejn ree loj
gualnadxeb xieen gualǵujt, b́en
ni guidib tiamp ni naban reeman
rdxeb reeman gualǵujt zi'c rdxeb
bejn xpatronman. ¹⁶Din laaman
ad bi'ttaman loj guidxliuj par
gagńeman anjl ree, bi'ttaman
par gagńeman b́en naj ree xdiaa
Abraham. ¹⁷Zeel gojcaman
zi'cgajczi b́enguidxliuj, persi bidxin
dxej gojcaman tijb bixhioz zobjloj
delant loj Dios, bixhioz ni raya
bejn, b́en ŕujn t́e cumplid xtiidx
Dios persi gojc gudixxaman por xtol
ree bejn. ¹⁸Abi' guial laagajcaman
guzagdiaj been t́e xindxab guial
ad zuzoobtaman xtiidx Dios, zeel
laaman zajc gagńe ree b́en ni
caýujn xindxab naguiejn ǵuun
reeman dol.

**Jesús naj mazri b́en zobjloj
guial loj Moisejs**

3 Zeel compniar, ĺejt guial
ma najdi xbejn Dios, ĺejt
guial ma bacaabeeman ĺejt par
gaquidi xi'nman, gol badxe'guijc
Jesucrist guial laaman naj bixhioz
zobjloj, b́en raliduladx ree, b́en
guxhaal Dios loj guidxliuj. ²Din

Jesucrist bazoobaman xtiidx Dios
b́en bacaabee laaman zi'c bazoob
Moisejs xtiidx Dios delant loj
ree b́en Israel. ³Per mazri rayal
Jesucrist respejt guial loj Moisejs
guial mazri zobjblojman, zi'c tijb
b́en ni ŕujn yu mazri ruza't reeman
laaman zagdxe guial loj yu guin.
⁴Gra yu yu'czi tijb b́en ŕujn laan,
per Dios laaman been gra ni yu'.
⁵Abi' Moisejs bazoobaman xtiidx
Dios, beenman sirv lojman chi
bad́eédaman xtiidxaman loj ree
b́en Israel persi bagojnman laa
reeman ni ŕeb Dios. ⁶Per Jesucrist
guial najman Xi'n Dios, laaman
rniabee loj gra ree xbejn Dios. Abi'
dunuj ree nayajc ree xbejn Dios
bal yasnuu yadxu'dxi'ch ree loj ni
raliduladx ree laaman sin guial
yalenya' ree abi' yaĺeéz ree xt dxej
bigra.

Gol guzujdxi'ch loj xnejz Dios

⁷Zeel, zi'c ŕeb xSprijt Dios:
Bal rucaagdiajguidi xtiidx Dios
yan dxej,
⁸ad cwexuudi zi'c been ree b́en
ad bacaagdiajgt xtiidxaman
chi been reeman laaman prueb
chi guzu reeman loj yujbidx.
⁹Abi' yagaj naj lod ad
bacaagdiajgt ree xb́engulalidi
xtiidx Dios
majsi baguiaa reeman milagr ni
beenman delant loj reeman
loj tiuu ijz niz loj yujbidx.
¹⁰Zeel bidxe'ch Dios b́en guin ree,
abi' ŕebaman:
“Xgab ren ŕujn reeman, ni'quid
ŕujnt reeman naguiejn
din gagbee reeman xhienaag
ŕenan ǵuun reeman.”

¹¹ Zianan zeel bidxe'ch Dios abi' rëbaman

guial ad yu't dxej gap reeman xguialraziiladx Dios.

¹² Zeel gol gojp cudad compniar raliduladx ree Jesucrist, chitëë chu' tijbidi guial por xixgab malidi ni rudxoon chililadxidi, guibi'cadi loj xnejz Dios bén naban. ¹³ Mejrli guixie guixie gol guneeñë gol badxe' tëë luxdoo ree lasa'di naga yu' tiamp, chitëë ad zuzoobtridi xtiidx Dios guial ma been dol lëjt gan. ¹⁴ Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guia'xchej.

¹⁵ Abi' zi'c ma rnin lojdi, loj xtiidx Dios rëb:

Bal rucaagdiajguidi xtiidx Dios yan,
ad bal gaquidi nad zi'c goc ree bén ad bazoobt xtiidx Dios gocli.

¹⁶ Abi', ÷chuza ree nin ad bazoobt xtiidx Dios majsi biguiejn reeman ni guneeaman? ÷Nid bén Israel ni babëë gajc ree Moisejs Egipton ya? ¹⁷ Abi', ÷nid laagajc reeman bidxe'ch Dios loj tiuu ijz ya por dol ni been reeman abi' zien reeman güjt loj yujbidx? ¹⁸ Abi', ÷nid bén guin gajc reen rëb Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman? ¹⁹ Zian rayagbee ree guial ad gojpt reeman guialraziiladx guin guial ad bililadxt reeman ni rëb Dios loj reeman.

4 Zeel yan guial sta raya'p ree promejs ni been Dios guial

yaya'p ree xguialraziiladxaman, rayal yaya'p ree cudad chitëë awa raya'p ree promejs guin yaya'n tijb dunuj ree guial ad zaya'pt ree guialraziiladx guin. ² Din dunuj ree ma bacaagdiajg ree xtiidxza'c Jesucrist zi'cgajc laa reeman, per laa reeman achet sirv been guial bacaagdiajg reeman diidx guin ree, guial ad bililadxt reeman laan. ³ Per dunuj ree guial ma baliduladx ree xtiidx Dios, ma raya'p ree guialraziiladx guin, sa'n por ree bén ad bililadxt rëb Dios:

Guial bache'ch reeman naj zeel ma benan xgab guial ad zajpt reeman da guialraziiladxan.

Diizd chi gule'cchaaw Dios guidxliuj baloox xchiinman, ⁴ zi'c rëb loj xtiidxaman por dxej ni raziiladx bejn:

Chi gulox been Dios gra xchiinman dxel ni goc gajdx dxej baziiladxaman.

⁵ Per par ree bén ad bazoobt xtiidxaman rëbaman:

Ad yu't dxej gap reeman da guialraziiladxan.

⁶ Bén biguiejn ree xtiidx Dios yaloj, ad gojpt reeman guialraziiladx guin guial ad bazoobt reeman xtiidxaman, per sta yu' ree bén ryaadx gap guialraziiladx guin.

⁷ Zeel chi gudëd zien ijz, Dios gulëëca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:

Bal riguiejndi xtiidx Dios yandxej, gol bazoob xtiidxaman.

⁸ Din bal por Josué ni ajp ree bén Israel guialraziiladx, ad

nuza'tt Dios zatijb dxej. ⁹Zeel xt yandxej yu' gualraziiladx guin par ree xbejn Dios. ¹⁰Din b́en rajp xgualraziiladx Dios, raziiladxaman xieen gra xchiinman zi'c baziiladx Dios chi gulox been xchiinman. ¹¹Zeel rayal yaguieen ree naguiejn yaya'p ree gualraziiladx guin, chit́e chu ǵuun zi'c been ree b́en ad bazoobt xtiidx Dios.

¹²Din xtiidx Dios nabanan rajp t́e gualrniabee. Mazri ŕezan guial loj tijb espad ni nadoxh grop lad, ŕezan ĺen luxdoo bejn ńe ĺen xsprijtaman. Xt ĺen dxijt ńe ĺen yob ŕezan, abi' por laan ragbee bejn bal ni mal o ni zagdx naj ni ŕenman ǵuunman. ¹³Achetzi ni been Dios zajc guiguie'ch lojman, din gradooczan ruguiaaman, abi' lojman naj yad́e ree cwent.

Jesús naj bixhioz mazri zojbloj

¹⁴Zeel guial ma raya'p ree bixhioz ni mazri zojbloj, abi' laaman naj Jesucrist Xi'n Dios, b́en ma zojb xanyabaa, rayal yasnuu yadxu'dxi'ch ree loj ni raliladx ree laaman. ¹⁵Din Jesucrist b́en naj dux bixhioz zojbloj ree laaman zajc gagńe dunuj ree chit́e ǵuun dol dunuj ree gan. Din ńe laaman guzajc gralój zi'cgajc cayza'c ree, per laaman ad yu't dxej beenman dol. ¹⁶Zeel con confianz ma zajc yabiig ree loj Dios yarejdx yanaab reeman, b́en ŕen dunuj ree par yayaman dunuj ree. Abi' guial ŕenman dunuj ree, laaman gagńe dunuj ree loj hor ni yaýen ree chu ǵuun dunuj ree yudar.

5 Gra b́en rajc bixhioz mazri zojbloj, Dios gulej laaman loj

ree bejn persi rbejdx rniabaman Dios por ree bejn. Abi' lojman rud́e bejn gon par Dios ńe ree be ni guiét por ree xtol ree bejn. ²Abi' guial b́enguidxliuj gajc naj bixhioz guin, zeel ragbeeman xhienaag rzajc bejn. Zeel rile' rajpaman pacens b́en ni ad ragbeet xhienin ŕujn, ńe ree b́en ad zinalt xnejz Dios. ³Abi' guial yu' chi ŕujn bixhioz guin dol zeel ńeman ruǵjt tijb be zi'c gon par Dios por xtolaman, zi'cgajc ŕujnman por ree bejn.

⁴Abi' achut zajc guiéb guial gacaman bixhioz zojbloj, Dios naj b́en rbe laaman zi'c guleman Aarón. ⁵Ziangajc gojc con Jesucrist, ad laataman ŕeb guial gacaman bixhioz zojbloj par dunuj ree, Dios bacaabee laaman, chi ŕebaman:

Ĺuj naj da Xi'nan, abi' diidz yan gulún guial ĺuj naj da Xi'nan.

⁶Ziangajc ŕeb zatib lajt loj xtiidx Dios por Jesucrist:

Ĺuj naj bixhioz par tiblayaa zi'c goc Melquisedec bixhioz.

⁷Chi guban Jesucrist loj guidxliuj guie dád biinman gurejdx gunabaman Dios b́en zajc yab́e laaman loj gualǵjt ni gudédaman. Dxel bidxga' Dios Jesús bad́eman laaman valor guial bazoobaman gra xtiidxaman.

⁸Majsi Xi'n Dios najman, per basiidaman bazoobaman diidz majsi guzagdiajman. ⁹Abi' guial guidiblagaa beenman gra ni ŕen Dios ǵuunman, zeel por laaman tiblayaa ma yu' perdon par gra ree b́en guzoob xtiidxaman. ¹⁰Abi' Dios naj b́en gule laaman par gacaman bixhioz zojbloj zi'c goc Melquisedec bixhioz.

**Royal yasnuu yaguieenbee
ree xtiidx Dios**

¹¹Dád zien ni yu' ganin lějt por ree ni guin, per nawěeg najn par ganinan zi'c rėnan guial dád nen rignia'di. ¹²Ma gojc xchej da't núnbeedi xtiidx Dios, yan bal zajcan, lějt ma royal guliüü ben ren ree, per lějt sta ryaadx chu' b́en guliüü lějt xtiidx Dios stijb ni basiididi guia'xchej. Lějt naj zi'c tijb xindoo ni rė' ganax lejch luar gawix graloj. ¹³Abi' gra ree b́en naj zi'c xindoo ad wayajct gaw graloj, ad zile't gagbee reeman conin naj xnejz. ¹⁴Per ree b́en ni cusnuu cayignia' xtiidx Dios, laa reeman naj zi'c b́en ma raw graloj guial ma rignia' reeman conin naj zagdxe con tēenin naj ni mal.

6 Zeel royal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhienaag yasa'n ree ni mal ni baguieen ree yaloj, o xhienaag yaliduladx ree Dios, ²o xhienaag tiobnijs bejn, o xhienaag yadxiib du yaa ree guijc bejn, o xhienaag yasban Dios bengüt ree, o xhienaag güün Dios xguialguxtisaman chi guidxin dxej yaděed ree cwent lojman, ³zagdxeli naj guial yasnuu ree yasiid ree xtiidxaman. Abi' Dios gagně dunuj ree din chile' yaguieen ree zian.

⁴Din b́en ma ragbee ree xcwent Dios, b́en ma núnbee ree xcwent ree ni yu' xanyabaa, b́en ma gubajn ree con xSprijt Dios, ⁵abi' bayuladx reeman xtiidxza'c Dios, ma ragbee

těe reeman xhienaag nabee Dios, ⁶dxel rusa'n reeman guial chinal reeman xtiidxza'c Jesucrist, par laa reeman dád nawěeg naj chu' reeman loj xnejz Dios, din zi'c ruliüü cucaa reeman Jesucrist Xi'n Dios loj crüjz zatijb din guze' ree bejn laaman. ⁷Bénguidxliuj ree naj reeman zi'c tibli'a' guidxliuj ni rė' guibidx guia ni ryajb, abi' bal rajc da't guiniaa guin par b́en rüjn dxiin lojn dxel rüjnle' Dios laan. ⁸Per bal ganax guiějch nē ree gui'xh mal rliejn lojn, dxel ad rüjntan sirv, abi' mazri zěed gajxh casti par guidxliuj guin abi' casti guin naj guial che'can.

**Ni nuzujdxi'ch dunuj
ree loj xnejz Dios**

⁹Ad caynatan zian por lějt, din dunujn rayagbee guial zagdxen cayüjndi, guial zinalquidi ni royal güündi din laadi loj xcasti Dios. ¹⁰Abi' laaman rüjn xguialguxtisaman zi'c royal, abi' ad zayanladxtaman ni zagdxe ni beendi nē guial ma balüüdi guial rėndi laaman, abi' beendi yudar cusnuu tēe cayüjndi yudar dux compniar ree b́en raliduladx ree Jesucrist. ¹¹Per dunujn rayėnan guial gusnuu güündi zian xt dxej chigra, sin guial yalenya'di din yayalidi ni cabězidi tia'di. ¹²Ad gaquidi b́en ploj, gol been zi'c been ree b́en bililadx Dios sin guialralenya' tia' reeman ni rėb Dios tia' reeman.

¹³Chi been Dios promejs loj Abraham, baza't laagajcaman din achut b́en mazri lasajc guial lojman, ¹⁴abi' rėbaman loj Abraham: “Naj

diidxli gúnle' lúj abi' dád zien ree xdiaal chu'." ¹⁵Abi' Abraham guyuman pacens ad balenya'taman persi cwa'man ni rēb Dios gudēēman lojman. ¹⁶Chi rúnj bejn jurar, rúnjman jurar por stíjb b́en mazri lasajc guial lojman din guiguien guial diidxliqui gúünman ni rēbaman. ¹⁷Ziangajc yan, guial rēn Dios gulüüman loj ree b́en ni tia' ni rēbaman guial ad yu't dxej guchaa xixgabaman por promejs ni beenman, zeel beenman jurar. ¹⁸Tio'p ni ad zaze'nt been Dios, beenman promejs been tēēman jurar abi' rayagbee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din gúünman dunuj ree yudar guial ma raya'p ree confianz guial gac zi'c ma rēbaman. ¹⁹Abi' guial rayagbee ree guial gac zi'c ma rēb Dios, zeel nadxu'dxi'ch ree loj xtiidxaman zi'c nuzujdxi'ch tıjb ganch guııb tıjb barcw. Abi' guial nadxu'dxi'ch ree diızd xanyabaa zēēdan, ²⁰lod ma guyu Jesús par guıxhialaman nejz par dunuj ree, b́en ma naj bıxhıoz zıjbloj tıblayaa zi'c goc Melquisedec.

Jesús naj bıxhıoz zi'cgajc gojc Melquisedec

7 Melquisedec gojc rey Salem gojc tēēman xıbxhıoz Dios b́en yu' xanyabaa. Chi baza Abraham loj wadıjł lod beenman gan rey gudılñe ree laaman, dxel bıgchaagloj Melquisedec laaman, abi' beenle'man Abraham. ²Dxel loj gra ree ni been Abraham gan, beenman laan chıı lala' abi' badēēman tıjban loj Melquisedec.

Melquisedec rēn guıēban “rey ni rúnj xguıalguxtis zi'c rayal”, Abi' guıal gojcaman xrey Salem rēn guıēban “rey rabe'cdxe luxdoo ree bejn”, din Salem rēn guıēb “ni rabe'cdxe luxdoo ree bejn”.

³Melquisedec guın achut ragbee chu naj xDadaman, o xniaaman o chu ree nin naj xdiaaman. Achut ragbee goc gojlaman goc tēē gújtaman. Laaman goc bıxhıoz zi'cgajc Jesús Xi'n Dios b́en ma naj bıxhıoz par tıblayaa.

⁴Gol been xgab xi b́en lasajc gojc Melquisedec nadxel. Zeel xt dux b́engulal ree Abraham badēē tib part loj chıı ni beenman gan loj ree rey ni gudılñēman. ⁵Loj ley rēb guıal ree bıxhıoz Israel ni zēēd loj xdiaa Levı rajp reeman derejch tia' reeman tib part loj chıı ni rajp ree b́en Israel, majsi tıjbzi loj xdiaa Abraham zēēd gra reeman.

⁶Melquisedec majsi ad zēēdtaman loj xdiaa Levı, per cwa'man tib part loj chıı ni been Abraham gan. Dxel beenle'man Abraham b́en cwa' xpromejs Dios. ⁷Abi' dunuj ree rayagbee guıal b́en rúnjle' stıjbj bejn, mazri lasajcaman guıal loj b́en rúnjle'man. ⁸Per gra ree bıxhıoz ni rtia' tib part loj chıı la' ni rajp ree bejn, rējt gajc reeman zi'cgajc dunuj ree. Sa'n Melquisedec b́en cwa' tib lia' ni been Abraham gan, loj xtiıdx Dios ruza't laaman zi'c rulüü sta nabanman. ⁹Yan zi'c rulüü yaguıe'ch ree guıal Levı con ree bıxhıoz ni zēēd loj xdiaaman b́en ni rtia' ree tib part loj chıı ni rajp ree bejn ñe reeman badēē tib part guın loj Melquisedec loj hor ni bıgchaagloj Melquisedec

dux b́engulal ree Abraham. ¹⁰Din chi bigchaagloj Melquisedec dux b́engulal ree Abraham, ad wayut Lev́i, per loj xdiaa Abraham źeéd Lev́i.

¹¹Bal por ree bixhioz Levitas nile' niajc bejn naya delant loj Dios por ley ni guyu par ree b́en Israel, dxel ad ŕuntri naguiejn ni't stijb bixhioz b́en naj zi'c Melquisedec ad zi'ct Aarón. ¹²Din chi bidxaa bixhioz ńegajc ley bidxaa, ¹³din dux Dad ree Jesucrist laaman naj bixhioz guin. Per ad lojt xdiaa ree bixhioz źeédaman, loj diaa ren źeédaman abi' ni'qui tijb ree xdiaaman ad gojct bixhioz. ¹⁴Dunuj ree rayagbee guial loj xdiaa Judá źeéd dux Dad ree Jesucrist abi' Moisejs ad baza'ttaman diaa guin chi ŕebaman chu reenin gac bixhioz.

¹⁵Per laa rguien gajc guial Jesucrist naj bixhioz zi'cgajc Melquisedec, ¹⁶guial ad lojt xdiaa Lev́i źeédaman zi'c ŕeb loj ley par gac bejn bixhioz, najman bixhioz guial rajpaman guialrniabee guibanman tiblayaa. ¹⁷Din ze ŕeb loj xtiidx Dios por laaman:

Ĺuj naj bixhioz par tiblayaa, lasa' bixhioz ni goc Melquisedec.

¹⁸Zianan zeel gojc ley guin tiblad guial ad beentan sirv guial ńujn bejn zi'c rniabee ley guin. ¹⁹Ad bile't ńujn ley guin gan nibajn bejn zagdxel delant loj Dios. Per luar ley guin zagdxel naj guialrliladx ni raya'p ree din por guialrliladx guin ma raya'p ree nejz par yadxin ree loj Dios. ^{20,21}Gulal chi ru bejn rajcaman bixhioz, achet promejs been Dios, per chi bacaabee Dios Jesús gacaman bixhioz, Dios

been promejs zi'c ca tiblayt loj xtiidxaman lod ŕeb:

Dux Dad ree Dios ma been promejs abi' ad zuchaat xixgabaman:

“Ĺuj naj bixhioz par tiblayaa, lasa' bixhioz ni goc Melquisedec.”

²²Zeel zian zagdxel naj nejz cúb ni guxhal Jesús par yadxin ree loj Dios.

²³Gulal zien gojc ree bixhioz per guial rdxin dxel ŕejt reeman ad bile't niajc reeman bixhioz par tiblayaa.

²⁴Per Jesús ad yu't dxel guietaman ad yu' t́eét dxel lox guial najman bixhioz. ²⁵Zianan zeel ríle' rabéeman bejn ree loj xcasti Dios, b́en ŕen ree gap nejz par guidxin reeman loj Dios por laaman, din laaman rajpaman guialnaban par tiblayaa par cwedx guiniabaman Dios por laa reeman. ²⁶Zeel laaman naj bixhioz zobjloj b́en rayaadx ree gagné dunuj ree. Din laaman naj b́en naya nali, achet ni mal ŕujnman, nayaman loj Dios, garen najman guial loj b́endol, abi' zobjbaman xanyabaa cwé' Dios. ²⁷Laaman ad ryadxt ǵuünman zi'c ŕujn ree bixhioz zobjloj guial guixie guixie rugíjt reeman be gui'xh zi'c gon par Dios. Yalój por xtol gajc reeman dxel por xtol ree ben ren. Per

Jesús con tib volt ǵujtaman por dux tol ree, ad ryaadxtri guietaman stijb.

²⁸Por ley bile' gojc ree bejn bixhioz zobjloj majsi ad nayaalojt naya reeman niz loj Dios. Per despuejs ŕeb Dios guial diidxliczi xi'nman gac bixhioz zobjloj, laaman nayaaloj nayaman niz loj Dios zianczi.

Jesús naj dux bixhioz zobjloj ree

8

Loj gra diidx ni caydü ree ni mazri lasajc naj guial

Jesucrist naj dux bixhioz zojbloj ree, bën ni ma zojb xanyabaa xladbee Dios bën rniabee. ²Ni ma rijnman sirv guialbixhioz, lën yadoo ni bazoob Dios, ad bênguidxliujt. ³Gra ree bixhioz zojbloj loj guidxliuj guie xchiin reeman naj guial rinë reeman gon rugijt tēē reeman be ree zi'c gon par Dios. Ziangajc Jesucrist bën naj dux bixhioz zojbloj ree yu' ni badëēman loj Dios. ⁴Abi' bal sta za' Jesucrist loj guidxliuj guie ad niajctaman bixhioz, guial ma yu' ree bixhioz ni rinë ree gon loj Dios zi'c rniabee ley ni basa'nnë Dios Moisejs. ⁵Per gra ni rijn ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh güün Moisejs yadoo, dxel rëb Dios lojman: “Baguiaa zagdxe din güünl zi'cgajczi balün lüj ruguia' Sinaí.” ⁶Per mazri zagdxe naj ni rijn Jesucrist, bën bayal naj dux bixhioz zojbloj ree, din mazri zagdxe naj nejz cüb ni guxhalaman din chile' yadxin ree loj Dios. Abi' por nejz cüb guin mazri zagdxe naj ree xpromejs Dios par bejn.

⁷Bal por ley nile' nibajn bejn zagdxe delant loj Dios, dxel ad rüjnt naguiejn niu nejz cüb. ⁸Per baguiaa Dios guial ad cayüjnt ree bejn zi'c rayal zeel rëbaman:

Naj rni guial guidxin dxej
gaxhalan nejz cüb
par ree bën Israel në ree bën
Judá.

⁹Per nejz cüb guin ad najtan zi'c ley ni basa'nan

loj xbéngulalidi chi babën laa reeman Egipto.

Abi' guial ad bazoobt reeman da diidxan

zeel gulëladxan laa reeman,
zian rëb Dios.

¹⁰Rëb tēēman:

Zian ma baya'n diidx gac con ree bejn chi guidxin dxej guijc reeman yasa'nan da leyan abi' lën luxdoo reeman gucanan. Dxel naj gac xDios reeman, abi' laa reeman gac da bejnan.

¹¹Dxejzii ree ad rijntri naguiejn gusiid ree bejn lasa' reeman. Ni'qui bijch reeman par güünbee reeman naj, din gra reeman güünbee naj, diidz xindobëz xt bengol.

¹²Abi' naj güin perdon gra ree ni mal ni ma been reeman, abi' ad yu't dxej gusaaladxan xtol reeman.

¹³Chi rëb Dios guial guixal nejz cüb guin rën guiëban guial achetri sirv rijn nejz gulal guin ni gop ree bejn par guidxin reeman lojman, abi' ni ad rijntri sirv nayob nitan.

Yadoo ni yu' loj guidxliuj në yadoo ni yu' xanyabaa

9 Dunuj ree rayagbee guial chi binal bejn ley ni cayguie'ch ree naj nejz gulal, loj ley guin zëēd xhienaag guiën bejn Dios, xhie tēē naag rayal güün reeman tijb yadoo loj guidxliuj guie. ²Lën yadoo guin guzëēb tijb lajd persi gojcan tio'p lën. Tijb lënan ni naj niz ro' port, lod brii laj lod nada abi' lën guin guzobj ni ru gandel në tijb mex ni gudxib ree guiadxtil ma gogle'. ³Dxel stijb lën guin xijch lajd guin

brii laj lod mazcsi nada. ⁴Ĺen guin guyu tijb altar ni or lod rgu' reeman goxal ńe tijb caj ni brii laj xcaj xpromejs ree Dios. Abi' caj guin naduüban or zi'c ĺenan zi'c xijchan. Ĺen caj guin yu'chaaw guiaj ni ca ree guidxii xmandamient Dios ńe xvar Aarón ni baga' con stijb re or ni guyuchaaw mana. ⁵Dxel guijc caj guin guzobj tio'p xfigur ree anjl b́en la ree querubines abi' con xhiil reeman rusiaaw reeman guijc lod ruroob bixhioz zobjloj xrejn ree be por xtol ree bejn. Per por yan ad rüjnt naguiejn guzatan mazri ree ni guin lojdi.

⁶Chi gulox been reeman gra zi'c rayal gac ĺen tijb yadoo loj guidxliuj guie, dxel guixie guixie guyu ree bixhioz ĺen yadoo guin per naabzi lod brii laj lod nada, lod rguieen reeman ni rayal güün reeman par Dios. ⁷Per stijb ĺen guin lod la mazcsi nada, tijbzi bixhioz zobjloj ru ni tib volt ĺen tib ijz. Abi' ad zajct chu'man bal id zinëman xrejn ree be din güün Dios perdon xtolaman ńe xtol ree bejn. ⁸Por ree ni guin rulüü xSprijt Dios dunuj ree guial la'tgaj rüjn sirv lod brii laj lod nada ad yu't mod chu' bejn lod la mazcsi nada. ⁹Gra ree ni guin najzi reen tijb ejempl par dunuj ree yan, din gon ńe ree be ni binë ree bejn par Dios, ad beent reen sirv par nayaaloj ninialadx reeman guial ma naya reeman loj Dios. ¹⁰Gra ree costumbr ni gop reeman zi'c ree con ni gudaw reeman, ńe ree ni gu' reeman ńe gra ree ni rayal güün reeman din naladx reeman guial ma naj reeman naya, laan naj ni gunabee ley güün ree bejn xt dxej ni bachaa Dios gra.

¹¹Din yan ma bi't Jesucrist, b́en naj bixhioz zobjloj par dunuj ree, abi' por laaman ma raya'p ree yaya'p t́eë ree ni ma rëb Dios yaya'p ree. Abi' mazri zagdxe naj ĺen yadoo lod ma guyuman mazri lasajc yadoo guin guial ad zobjtan loj guidxliuj guie ad gojc t́eëtan por ree bénguidxliuj guie. ¹²Jesucrist ma guyuman ĺen yadoo lod nada da't, per ad con xrejt ree go'n dobëz o xrejn ree dxib, guyuman con quijb xrejnman. Laaman con tib volt guyuman, ad rüjnt naguiejn güünman zian stijb abi' por laaman raya'p ree perdon par tiblayaa.

¹³Tiamp gulal xrejn ree dxib o xrejn ree go'n o cobdëj ni we'c ree vagdobëz ruroob bixhioz guijc ree bejn persi naladx reeman ma naya reeman. Yan bal zian naladx reeman guial raya'n reeman naya, ¹⁴diidxgui con xrejn Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni rën Dios b́en naban. Din por xguialrniabee xSprijt Dios, Jesucrist b́en ad beentczi dol, badëë laagajcaman zi'c tijb gon par Dios.

¹⁵Zeel por Jesucrist ma raya'p ree tijb nejz cüb par yadxin ree loj Dios. Din por xguialgüjt Jesucrist ma yu' perdon par dux tol ree ńe xtol ree b́en ni binal ley, gra ree b́en naj xbejn Dios zian yaca' ree ni rëb Dios yaya'p ree par tiblayaa. ¹⁶Din zi'cgajc tijb b́en rlies tijb gui'ch guial chu yaya'nnë ree ni rajpaman, ad züjnt gui'ch guin dxiin xt chi ma güjtaman. ¹⁷La'tgaj naban b́en guin achet sirv rüjn gui'ch guin, rüjnan sirv xt chi ma

güjtaman. ¹⁸Zeel diizd tiamp gulal par guzuloj been sirv ley ni basa'n Dios loj Moisejs, bagüjt reeman tio'p choon ree be gui'xh persi gulëe reeb rejn. ¹⁹Din chi gulox bagojn Moisejs gra ree bejn gra ni zëed loj xley Dios dxel cwa'man guidxlad xiil ni nayë' culor xnia bacaaman laan guiç tib xidx yag ni la hisopo, dxel badxe'man laan loj nijs ni no'ch xrejn ree go'n dobëz con xrejn ree dxib dxel bacojpaman laan loj libr ley në guiç ree bejn ²⁰rëbgajman: “Rejn guie naj tijb sen guial ma baneë Dios xleyaman lojdi par güündi laan cumplid.” ²¹Bacojp tëeman rejn guin lën yadoo në guiç gra ree ni rüjnnë ree bixhioz dxiin lën yadoo. ²²Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

Xrejn Jesucrist rquied dol

²³Zeel par guiguien guial ma naya ree ni beennë ree bixhioz dxiin lën yadoo guin, gojc naguiejn bagüjt reeman be ree persi beenle' reeman ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be. ²⁴Abi' Jesucrist ad lënt yadoo ni been bënguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios. ²⁵Jesucrist ad biaadxt niëjtaman zien volt por dol ree, ad beentaman zi'c been ree bixhioz zobjloj guial gazobijz binë reeman xrejn ree be lën yadoo lod brii

laj lod nada da't. ²⁶Din bal id zian, zien volt niëjtaman diizd chi gocchaaw guidxliuj. Per chi bidxin dxej bi'taman, con tib voltzi badëe laagajcaman par guiëtaman din chiquied dux tol ree. ²⁷Zi'cgajc gra bejn tib voltzi rëjt reeman, dxel zëed ni yadëed reeman cwent loj Dios. ²⁸Ziangajc Jesucrist tib voltzi badëe laagajcaman par guiëtaman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignëman bën cabëz ree laaman.

Ad leyt riquied dol

10 Ley ni basa'nnë Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz güjt ree be par Dios zi'c gunabee ley güün bejn, per ad guyut dxej ni naladx reeman guial ma bayaaloj naya reeman loj Dios. ²Din bal ninialadx reeman guial ma naya reeman con tib volt ni bagüjt reeman be ree par Dios, dxel ad ryaadxtri nüjn reeman zian guial ma ragbee reeman achetri xtol reeman. ³Per ad gunaladxt reeman zian, gazobijz rusaaladx xtol reeman chi rugüjt reeman be ree par Dios, ⁴din xrejn ree go'n në xrejn ree dxib ad zajct chiquiedan xtol ree bejn. ⁵Zeel chi bi't Jesucrist loj guidxliuj, rëbaman loj Dios: Ad rëntil xrejn ree be ni'qui los demazri ree ni ridnë bejn par lüj, zeel baneel naj cuerp ni ra'pan loj guidxliuj guie. ⁶Ad rëntril guial ruze'c reeman be ree par lüj ni'qui xrejn ree be ni ridnë reeman por xtol reeman.

⁷ Zianan zeel ŕen:

“Laa naj guie, Dad Dios,
zialan par ǵunan zi'c ŕenl,
zi'c ca loj libr por naj.”

⁸ Jesucrist yaloj ŕebaman guial ad ŕent Dios xrejn ree be, ni'qui los demazri ree ni riné bejn par laaman, ni'qui guial ruze'c reeman be ree por xtol reeman zi'c rniabee ley ǵuün reeman. ⁹ Chi gulox ŕeb Jesús zian, dxel ŕeb t́eëman: “Laa naj guie, Dad Dios, zialan par ǵunan zi'c ŕenl.” Zianan baloox Jesucrist guial rinal ree costumbr ni ŕeb loj ley abi' guxhalaman tijb nejz cüb par yadxin ree loj Dios. ¹⁰ Yan ma nayajc ree naya delant loj Dios guial ma been Jesucrist zi'c ŕen Dios, badëëd laagajcaman ǵüjtaman por xtol ree bejn, con tib volt par tiblyaaa, ad ryaadxt ǵuünman zian stijb.

¹¹ Gra ree bixhioz Israel guixie guixie za' reeman cayüjn reeman gra ni rniabee ley ǵuün reeman, abi' guixie guixie rugüjt reeman be ree par Dios. Abi' majsi zien volt rüjn reeman zian per ad rquiedt gualrugüjt be guin ree xtol ree bejn. ¹² Per Jesucrist con tib volt badëëd laagajcaman ǵüjtaman por xtol ree bejn, ad ryaadxt ǵuünman zian stijb. Dxel gurejman xladbee Dios, ¹³ lod cabèzaman guidxin dxej nabeeman loj gra ree b́en rdxe'ch laaman. ¹⁴ Din laaman con tib volt badëë laagajcaman ǵüjtaman por xtol ree bejn dxel tiblyaaa ma naya ree b́en rliladx laaman. ¹⁵ Abi' dunuj ree rayagbee ree guial walin din por xSprijt Dios zëëd ree diidx ni ca loj xtiidx Dios guial ŕeb Dios:

¹⁶ Zianan ma baya'n diidx gac

con ree bejn chi guidxin dxej:

Guijc reeman gusa'n da leyan
abi' ĺen luxdoo reeman gucanan

¹⁷ Abi' ŕeb t́eëman:

Ad yu't dxej gusaaladxan xtol
reeman
në graloj ree ni mal ni ma been
reeman.

¹⁸ Abi' zi'c ma yu' perdon par dol,
ad rüjntri naguiejn guiët ree be por
dol.

Royal yubiig ree loj Dios

¹⁹ Zeel compniar raliduladx ree Jesucrist sin gualrdxeb ma zajc yadxin ree lod zojb Dios por xrejn Jesucrist, ²⁰ din chi badëëd xcuerpaman persi ǵüjtaman, guxhalaman tijb nejz cüb ni zidnë gualnaban par dunuj ree. ²¹ Yan zi'c ma rniabee Jesucrist dunuj ree, b́en naj bixhioz zojbloj xanyabaa, ²² con guidib du luxdoo ree ma zajc yubiig ree loj Dios con tijb gualrliladx ni wali ree raliduladx ree laaman, con tijb quiarguiejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya. ²³ Zeel royal yadxu'dxi'ch ree loj ni raliduladx ree Dios, din laaman züjn cumplid xtiidxaman zi'c ma ŕebaman. ²⁴ Royal yaguieen ree xgab xhienaag yalu' ree luxdoo ree dux compniar ree yayèn t́eë du lasa' ree yaguieen t́eë ree ni naj zagdxe. ²⁵ Ad rayalt yaguieen ree zi'c rüjn ree b́en ad rejtri ree lod radxaag lasa' ree dux compniar ree par chignia' reeman mazri xtiidx Dios, royal yalu' ree luxdoo du lasa' ree, abi' mazri yan guial ma rayagbee ree guial ma zidyob dxej gui't Jesucrist stijb.

²⁶Din bal ma rayagbee ree xtiidxli Jesucrist abi' baguieen ree xgab yaguieen ree mazri dol, dxel ad yu'tri por chu zajc yayajc ree perdon. ²⁷Ni cabési dunuj ree naj xguialguxtis doxh Dios, tijb bajl lod yayal ree b́en ad ruzoobt xtiidxaman. ²⁸Chi bal id been tijb bejn zi'c rniabee ley ni basa'nné Dios Moisejs, abi' yu' tio'p choon testiw guial ad beent b́en guin zi'c rniabee ley guin, dxel ad yu'tri mod laaman loj guialgújt ni rayalaman. ²⁹Yan gol been xgab, ixipxi mazri castiro' yayal b́en rnieeguijdx xSprijt Dios b́en ragné dunuj ree! B́en ni naladx guial achet lasajc Xi'n Dios, abi' rújnman desprejs xrejnman, rejn ni rulüü guial gac zi'c rëb Dios, rejn ni rusia xtol bejn. ³⁰Dunuj ree rayagbee guial rëb Dios: “Naj rayal gün guialguxtis, naj gudé ni rayal bejn.” Rëb tēeman: “Dios naj b́en ni yaca' cwent por ni cayüjn bejn.” ³¹iAbi' nadxeb yayal bejn xcasti Dios b́en naban!

³²Per lëjt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra guialzi ni gudédidi. ³³Yu'di zien loj da't guialzi badëéd ree bejn lëjt, abi' baze' reeman lëjt delant loj ree bejn, yu' tēédi ad gulëéladxtidi b́en guzac ree zian. ³⁴Ad gulëéladxtidi b́en ni guyu ree ladxguiib, abi' chi baca' ree bejn gra ni rajpidi, babaagajquidi guial ma ragbeedi mazri lasajc ni rajpidi xanyabaa, në ree ni rajpidi ni, taan reen tiblayaa. ³⁵Zeel ad gusa'ndi guialrliladxidi Jesucrist, din por guialrliladx guin dád zagdxé naj ni tia'di. ³⁶Rüjn

naguiejn gapidi pacens din chile' güündi zi'c rën Dios, zian tia'di ni ma rëbaman guneeman lojdi. ³⁷Din loj xtiidx Dios rëb:

Nayob, dád nayob gui't b́en naj guit,
ad zaglaataman.

³⁸Abi' b́en naban zi'c rënan, guidib tiamp ni nabanman rlliladxaman naj.

Per bal gusa'nman ni rlliladxaman naj,
ad zabaanë'tan laaman.

³⁹Per dunuj ree ad nayajct ree zi'c ree b́en rusa'n ni rlliladx reeman Jesucrist abi' rayal reeman casti, dunuj ree nayajc ree b́en rlliladx Jesucrist diidxli par chitëë yayal ree casti.

Guialrliladx Dios

11 Yan, ¿xhienin naj guialrliladx? Guialrliladx naj guial guidiblagaa yaliduladx ree gac zi'c caylëjz ree gac, në guial waliqui ni raliduladx ree ni ad raguiaat ree. ²Dux b́engulal ree baya'n reeman zagdxé delant loj Dios guial bililadx reeman laaman. ³Zi'c raliduladx ree Dios, dunuj ree rayagbee guial con xtiidxaman beenman xanyabaa në guidxliuj në gra ni raguiaa ree, achetctzi ni beenman con ree ni raguiaa ree yan.

⁴Guial bililadx Abel Dios, zeel zagdxé naj gon ni badëéman guial loj Caín, abi' baya'nman zagdxé delant loj Dios abi' cwa' Dios gon ni bazaladx Abel lojman. Zian majsí ma güjt Abel, per sta rguiajt xhienaag bililadxaman Dios.

⁵Guial bililadx Enoc Dios zeel ad güjttaman, guidib nabanman

ziaman xanyabaa abi' ad badxejlt ree bejn laaman guial ma zignè Dios laaman. Per chi gadaman chignè laaman, loj xtiidx Dios rēb guial bayuladx Dios zi'c gubanman. ⁶Abi' achut zajc güün zi'c rēn Dios bal id rliadxaman laaman. Chutēēz b́en rēn gap nejz par guidxinman loj Dios rayal chililadxaman guial yu' Dios chililadx tēēman guial laaman rudēē ni rēbaman gudēēman loj ree b́en raguiil laaman.

⁷Guial bililadx Noé Dios dxel chi rēb Dios lojman guial gac ree ni gadaman guguaa gac bazoobaman xtiidxaman, beenchaawaman tijb barcw din laaman con ree xfamilaman loj ni rēb Dios gac. Dxel por guialrliadx guin biguien guial gra b́enguidxliuj rayal casti ni rēb Dios, abi' baya'n Noé zagdx delant loj Dios guial bililadxaman xtiidxaman.

⁸Ziangajc Abraham guial bililadxaman Dios, bazoobaman xtiidxaman chi rēbaman lojman din grii ladxaman cheman lod tia'man guidxliuj ni gudēēd Dios lojman. Abi' brii ladxaman ni'quid ragbeetaman banguin cheman. ⁹Guial bililadxaman Dios, gubajnman zi'c benzit loj guidxliuj ni rēb Dios gudēēdaman lojman. Gurejman lēn ree carp ni naj nē guid, ziangajc Isaac nē Jacob nē laa reeman rayal guidxliuj guin. ¹⁰Gubajn Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

¹¹Ziangajc Sara, por xguialrliadxaman, majsi ma

najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial rüjn Dios cumplid xtiidxaman. ¹²Zian gojc majsi bengol da't ma naj Abraham per gojcaman famil. Dád zien ree xdiaaman guyu zi'c ree bajl xanyabaa, zi'c ree üx ni riga' ro' nijsdoo ni ad zile't guiyab.

¹³Gra ree b́en ma bazatan xt bidxin dxej güjt reeman bililadx reeman Dios, majsi ad baguiaat reeman gojc cumplid gra ree promejs ni been Dios loj reeman, per guial rliadx reeman ragbee reeman guial zajc zi'c rēb Dios abi' rabaa reeman. Laa reeman ragbee guial tio'p choon dxejzi zēēd reeman loj guidxliuj guie ad tiblyaat. ¹⁴Abi' ree b́en rniee zian, zian rguienchaaw guial sta rguiil reeman lod diidxli gac ladx reeman. ¹⁵Din bal por guidxliuj lod guza reeman cayüjn reeman xgab, dxel zile' nayejc reeman ni stijb. ¹⁶Per laa reeman mazri rüjn reeman xgab por tijb luar lod naj mazri zagdx, mazri rüjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

¹⁷Guial bililadx Abraham Dios, dxel chi been Dios laaman prueb din gugüjt xi'nman Isaac din gudēēdaman laaman zi'c gon par Dios, cwējb Abraham majsi tijbzi Isaac guin naj xi'nman, majsi ragbee tēēman guial rēb Dios lojman: ¹⁸“Por xi'nl Isaac gacxhie da't xdiaal.” ¹⁹Per Abraham yu'guijcaman guial rajp Dios

guialrniabee xt par yasbanman bengüt ree, abi' zi'c ruliüü baban xi'nman stijb chi gudédaman prueb guin.

²⁰Ziangajc Isaac por guialrliladxaman Dios dxel chi beenle' ree xi'nman Jacob con Esaú, rëbaman xhienaag gac con tijbgaj reeman. ²¹Abi' ziangajc Jacob guial bililadxaman Dios ziangajc beenle'man grop ree xi'n Xiëb chi ma guidxin hor guiëtaman. Dxel cwa' yagriadxaman abi' gurejdx gunabaman Dios. ²²Ziangajc Xiëb guial bililadxaman Dios, chi ma guidxin hor guiëtaman, rëbaman guial grii ree b́en Israel Egipto, abi' rëbaman loj reeman xhienaag güünnë reeman xdxijtaman.

²³Por guial bililadx ree xdad xniaa Moisejs Dios chi gol Moisejs guin, baquie'ch reeman laax choon bëew guial baguiaa reeman najx xindoza'cdxoon, abi' ad bidxebt reeman guial rëb b́en naj rey guial guiët gra ree xindobëz. ²⁴Abi' chi goc Moisejs guin bengol, guial bililadxaman Dios, gojc xixgabaman cwexuuman niajcaman xi'n xi'ndxa'p rey Egipto. ²⁵Par laaman zagdxeli naj sagdiajman con ree xb́en Israelaman, luar nünjman dol niro'nladxaman laa reeman din niajpaman ni rënman, ni ad rdaant ree par tiblayaa. ²⁶Par laaman mazri lasajc sagdiajman zi'c Cristo luar niajpaman gra ree guialnaza'c ni yu' Egipto, din mazri yu'guijcaman guialnaza'c ni yayalaman delant loj Dios. ²⁷Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c

rulüü ruguiaaman Dios b́en ad zajct guguaiaa ree bejn.

²⁸Në guial bililadx Moisejs Dios, beenman lanij pascw, abi' gunabeeman baroob ree b́en Israel rejn ro' xport lidx reeman, din chi téd xianjl guialgüjt, ad zugüjttaman xi'n yaloj ree b́en Israel. ²⁹Guial bililadx ree b́en Israel Dios, gudéd reeman zi'c loj yujbidx lod bixal loj nijsdoo la nijsdoo xnia. Per chi guyèn ree b́en Egipto nidéd reeman, loj hor guin bayaaw nijs guin dxel gu' reeman nijs abi' güjt reeman.

³⁰Guial bililadx ree b́en Israel Dios, chi baza' gajdx dxej ni biaw reeman guiedx Jericó, dxel bazaj ze' ni nayaw guiedx guin. ³¹Abi' Rahab b́en goc béngunaa dxuudx luguiedx Jericó, guial bililadxaman ad güjtaman chi güt ree los demazri ree b́en ladxaman b́en ad bazoobt ree diidx, guial baca'man b́en Israel ni we ree bigla'ch luguiedx guin.

³²Yan, ÷xhie mazri ganin lojdi? Ad zadaant tiamp guin ganin lojdi xcwent Gedeón, Barac, Sansón, Jefté, Davi, Samuel në xcwent ree b́en badëë xtiidx Dios loj ree bejn. ³³Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni rëb Dios loj reeman abi' basiaaw reeman ro' ree beedx. ³⁴Guzuj reeman loj bajl ro' abi' achet goc reeman, gulaa reeman loj guialgüjt con espad, guyu reeman gojl chi rulüüczí ad yu't reeman gojl, guzudxi'ch reeman loj wadijl abi' balaagdxá reeman benzit ni gudilë reeman. ³⁵Në ree béngunaa ni güt ree xfamil, por guial bililadx

reeman Dios baban ree xfamil
reeman stijb.

Per yu' ree bejn majsi güjt
reeman, per par laa reeman mazri
zagdxe guzagdiaj reeman loj ree
b́en bagüjt laa reeman, luar nusa'n
reeman guialrliladx reeman Dios
par gap reeman stijb guialnaban
cüb ni mazri lasajc. ³⁶Yu' t́e
reeman guzagdiaj baze' ree bejn laa
reeman, gudijn ree bejn laa reeman,
xt guxhii ree bejn laa reeman con
caden abi' guyu reeman ladxguuib.
³⁷Yu' reeman bagüjt ree bejn
con guiaj, yu' t́e reeman bagüjt
reeman guléexhün reeman laa
reeman con sierr, güjt t́e reeman
con espad. Yu' t́e reeman biza gra
lad najcw reeman guid xab xiil ńe
guid xab dxib, probza laa reeman
naya biza reeman, gralój beenné
ree bejn laa reeman. ³⁸Biza reeman
niz loj yujbidx, niz ruguia' ree, ńe
gralój lén ree guiajbiliaa. B́en guin
ree ad rayal nibajn reeman loj
guidxliuj guial d́ad benza'c gojc
reeman. ³⁹Abi' majsi biguien guial
gra reeman diidxli bililadx reeman
Dios, per ad cwa't reeman ni
ŕebaman loj reeman. ⁴⁰Din laaman
beenman xgab tijb ni mazri zagdxe
par dunuj ree, abi' ad gojc gajt ni
ŕebaman loj reeman din tijbzi yaca'
ree ni ŕebaman con laa reeman.

yunaal ree Jesús

12 Zeel, zi'c ma bacaagdiajg
ree por zien ree bejn
xhienaag bililadx reeman Dios,
rayal yasa'n ree tiblax gra dol ńe
gra ree ni rudxoon yaguieen ree zi'c
rayal, ad zalenya' t́eet ree yunaal
ree nejz ni ma balüü Dios dunuj ree.

²Royal yadxe'guijc ree Jesucrist
din por laaman źeéd guialrliladx
ni raya'p ree abi' por tijbzi laaman
rayaalój guialrliladx ni raya'p ree.
Gudaanman gualzi ni gudédaman
loj crüjz, ad batutaman güjtaman
zian din ragbeeman guial chi ma
gulox guzagdiajman, dxel gui't
gualrabaa. Abi' yan ma zobjaman
xladbee Dios xanyabaa.

³Gol been xgab xhienaag
guzagdiaj Jesucrist chi basagdiaj
ree b́endol laaman, chit́e
yadxaguidi, ad yalenyadi por ni
cazajquidi. ⁴Din majsi cusagdiaj ree
bejn ĺejt guial cayüjndi naguiejn
ad cayüjntidi dol, per ad wazujtidi
loj gualgüjt por zian. ⁵¿Wen ma
bayanladxidi ya xhienaag banee
Dios ĺejt consejw najdi xi'nman? Loj
xtiidxaman ŕeb:

Xi'n, bidxga' zi'c runee dux Dad
ree Dios lüj consejw,
ad bal yalenyal' chi
guzuxnejzaman lüj.

⁶Din rüjnnamaan b́en ni naj ree
xi'nman,
ruzuxnejzaman laa reeman
guial ŕenman laa reeman.

⁷Zeel gol gudaan gualzi, din
zagdxe najn par ĺejt. Rüjnné Dios
ĺejt zi'c rüjnné bejn xi'nman, ¿wen
yu' dad ad ruzuxnejz xi'n ya?

⁸Yan bal id ruzuxnejz Dios ĺejt
zi'c rüjnné gra ree xi'nman, ŕen
guiéban guial ad najtidi xi'nman
diidxli, ad najtaman xDadidi. ⁹Ĺejt
ragbee guial chi bayajc ree xindoo,
gudijn dux dad ree dunuj ree din
yacaagdiajg ree xtiidxaman abi'
raya'p reeman respejt. Yan, ¿chexc
di ad ree yazoob xtiidx dux Dad ree
Dios b́en yu' xanyabaa, din yaya'p

ree guialnaban con laaman? ¹⁰Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdx. Per Dios ruzuxnejzaman dunuj ree par tijb ni mazri zagdx par dunuj ree, ruzuxnejzaman dunuj ree din yabajn ree naya zi'c laaman.

¹¹Diidxliczi achet guialnaa naj nix loj hor ni cadédilan, ragnaalil. Per ree b́en ni rusiid ruzoob diidx zian, laa reeman naban zagdx, naalyuj delant loj Dios.

Ad cwéeladxidi xtiidx Dios

¹²Zeel gol bagu' luxdoodi, gol badéed valor léjt gajc zi'c tijb b́en raca'ladx chi ma badxag da'taman.

¹³Gol been naguiejn gol gubajn xnejz, din ree b́en ragdxa xhie güün reeman, ad gusa'n reeman xnejz Dios, chu' luxdoo reeman zagdx chinal reeman laan.

¹⁴Gol been naguiejn guibandi zagdx con gra ree bejn, gol gubajn naya delant loj Dios din b́en ad nabant naya ad zile't guguaaman dux Dad ree Dios. ¹⁵Gol gojp cudad chitée chu' tijbidi gusa'n tiblax zi'c rën Dios gagnëman léjt chitée chu' tijbidi gac zi'c gui'xh nala ni rüjn guialquia abi' guxhiinan gra xcompniaridi. ¹⁶Ni'qui tijbidi ad rayalt sunëdi b́en ad najt lacheelidi, ad cwe'quidi tiblax ni zagdx ni zéed ree por Dios chitée saquidi zi'c guzac Esaú, por tijb guialraw bato'man guialrniabee ni rayalaman guial najman b́en yaloy loj bijchaman. ¹⁷Abi' léjt ragbee guial chi guyën Esaú nüjnle' xadamán laaman ad beenle'taman

laaman zi'c rayalaman. Majsí dád biinman gunabaman laan, per ad bile't nuchaaman ni beenman.

¹⁸Léjt gadidi chibig lod ad najt par gugaalidi zi'c gubig ree b́en Israel gulal guiyc guia' Sinaí lod baguiaa reeman cayajc bajl guiyc guia' guin, baguiaa reeman go'xh ya's ni basiaaw guiyc guia' guin abi' rbi' gaj tijb bidoxh yagaj zi'c bidojn. ¹⁹Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rnieenëman laa reeman. ²⁰Din ragbee reeman guial nawéeg naj ni gunabee Dios güün reeman chi rëbaman: “Chutééz bejn o be gui'xh ni gugaal guiyc guia' guie rayal guiëtaman o guiëtib con guiaj o con lans.” ²¹Nadxeb naj ni baguiaa reeman xt Moisejs rëb: “Rnijn guial tant rdxeban.”

²²Per léjt ma bibiguidi loj Dios, ad guzajctidi zian. Ma yu' nejz par guidxindi ruguia' Sión, xanyabaa lod naj Jerusalén ladx Dios b́en naban, lod nadxag lasa' ree zien da't ree anjl, ²³dád nix yu' luxdoo reeman rën reeman laaman lod yadxajg lasa' ree xbejn Dios b́en ni ma ca ree laj loj libr xanyabaa. Ni zojb Dios, b́en yanab cwent loj gra bejn, ni téë za' xSprijt ree b́en guban zi'c rayal laa reeman ma naya reeman por Dios. ²⁴Ni gajc zojb Jesucrist, b́en guxhal nejz cüb ni raya'p ree par yadxin ree loj Dios. Chi güit Abel xrejnman gunab gac guialguxtis, per con Jesucrist ad gojct zian, güjtlaman, guxhie' téë xrejnman par yayajc ree perdon.

²⁵Zeel gol gojp cudad gol bidxga' Dios, laaman najman b́en rnieeńe dunuj ree. Din bal b́en ni ad bidxga't ree xtiidx Moisejs b́en bad́eéd xtiidx Dios loj guidxliuj guie ad gulaat reeman loj casti ni rayal reeman, diidxgui dunuj ree nid zayal ree xcasti Dios ya bal id zayidxga' ree xtiidx Jesucrist, b́en guza diisd xanyabaa din guinieeńeman dunuj ree. ²⁶Chi gunee Dios b́engulal ree ruguia' Sinaí, binij guidxliuj. Per yan ma ŕebaman: “Gunin guidxliuj zatijb, per ad guidxliujtzi, ńe xanyabaa.” ²⁷Chi ŕeb Dios guial gúünman zian zatijb, ŕen guiéban guial gunijman gra ni beenman, din chiquied ni rayal chiquied din yaya'n ni ad rayalt chiquied. ²⁸Zeel rayal yad́eéd ree quixt́eé loj Dios guial ma rayal ree lod canabeeman, lod ad yu't dxej nit, abi' con respejt ńe guialrdxeb yaguieen ree ni ruladxaman. ²⁹Din dux Dios ree naj zi'c tijb bajl ni ruze'c gra.

Xhienaag gúün bejn ni yayuladx Dios

13 Ad cwéz guiéndi xcompniaridi b́en rliladx ree Jesucrist. ²Ad yayanlaxidi gud́eé lidxidi yaya'n ree b́en ri't, din zian yu' ree b́en baca' ree xianjl Dios sin guial gagbee reeman chunin.

³Gol basaaladx b́en yu' ree ladxguiib, gol gunaladx guial ńe ĺejt yu' ladxguiib con laa reeman. Gol been t́eé xgab por ree b́en ni cazagdiaj, gol gunaladx guial ńe ĺejt cazagdiaj.

⁴Gol gojp respejt guialruxhliaa, ad gusquiee lacheelidi. Din Dios

zud́eédaman casti b́en za'ńe xinguaaaw o b́engunaa ren, ńe gra ree b́en ni ŕujn ree ni dxuudx con ree b́en ad najt lacheel reeman.

⁵Ad śeébladxidi milia, gol baya'n conform con ni rajpidi din Dios ma ŕeb: “Gra dxej za'n con ĺuj, abi' ad yu't dxej gabéladxan ĺuj.” ⁶Abi' con confianz zajc yaguie'ch ree:

Da Dadan Dios naj b́en ragńe naj

ad rdxebtan majsi xhiet́eéz gúünńe ree bejn naj.

⁷Gol basaaladx ree b́en ni gunabee ree lojdi, b́en ni balúü ree ĺejt xtiidx Dios. Gol been xgab xhienaag gubajn reeman gol binal t́eé zi'c bililadx reeman Jesucrist.

⁸Abi' Jesucrist laagajcaman nieey, laagajcaman yan ńe zianczi. ⁹Ad tiébidí gusquiee gralój ni ruluü ree bejn ĺejt, din ad najt reen zi'c rayal chinalidi Cristo. Mazri zagdex gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajct gawidi, din costumbr guin ree achet yudar ŕujn ree delant loj Dios.

¹⁰Dunuj ree raya'p ree tijb b́en güt por dunuj ree, laaman naj zi'c tijb xgon bejn por xtolaman, gon ni ad zajct gaw ree bixhioz ŕujn ree sirv ĺen yadoo guin. ¹¹Bixhioz zobjloj guin, laaman riné xrejn ree be ni rud́eéd ree bejn zi'c gon por xtol reeman, rinéman rejn guin ĺen yadoo lod rayal chinéman laan. Dxel ree begüt guin re'c reeb ro' guiedx lod achut zobj. ¹²Ziangajc gojc con Jesucrist, ro' guiedx Jerusalén gújtaman par gusiaman bejn xtol reeman por xrejnman.

¹³Zeel yunaal ree Jesucrist majsi gulëe reeman laaman luguiedx Jerusalén, në majsi xhietëez guialxtu o guialrzagdiaj yadüüd ree zi'c laaman. ¹⁴Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylëjz ree lod yabajn ree tiblayaa. ¹⁵Zeel con xyudar Jesucrist ad yacwëez ree yadëed ree quixtëe loj Dios, laan naj gon yadëed ree lojman, abi' zian raxhoobdol ree guial nayajc ree xbejnman. ¹⁶Ad yayanladxidi güüindi ni zagdxë güün tëe lasa'di yudar con ni gactzidi, din laa reen naj ni ruladx Dios.

¹⁷Gol bazoob xtiidx ree b́en rniabee lojdi, b́en rulüü ree lëjt xtiidx Dios. Gol gojp reeman respejt din laa reeman ruguiaa lëjt din chinalidi xtiidx Dios, guial ragbee reeman yadëed reeman cwent loj Dios. Gol been ni yabaanë reeman ad ni cu'nayat laa reeman, din guial ad ruzoobt diidx achet sirv güünan lëjt.

¹⁸Gol gurejdx gunab Dios por dunujn. Dunujn rayagbee guial achet ni mal cayguieenan, abi' rayënan guial gra ni yaguieenan, yaguieenan laan xnejz. ¹⁹Rniaaban

lojdi din cwedx guiniabidi Dios por naj, din guneeman permis diob guialan din gazun con lëjt zatijb.

Diidx bigra ni bacan loj gui'ch guie

²⁰Dios b́en rabe'cdxe luxdoo ree bejn, b́en basban Jesucrist, rajpaman dunuj ree zi'c rajp tijb bejn xiil, por xguialgüjtaman zianczi ma raya'p ree nejz par yadxin ree loj Dios, ²¹laaman gagnë lëjt par gra ni naj zagdxë din chile' güüindi zi'c rënman. Laaman gagnë dunuj ree din yayajc ree zi'c rënman guial ma nayajc ree tijbzi con Jesucrist. ¡Laaman rayal yaya'p ree respejt zianczi! Amén.

²²Compniar raliduladx ree Jesucrist, ad naroobt gui'ch guie, per rniaaban lojdi ad yalenyadi por ree diidx ni canin lëjt cunen lëjt consejw. ²³Rugojn tëen lëjt guial ma barii dux compniar ree Timoteo ladxgüiib abi' bal nayob gui'taman niz guie, dxel du gropan yo'p yudganajn lëjt.

²⁴Gol bagajpdioz gra ree b́en rniabee lojdi b́en ni rulüü ree lëjt, në gra ree dux compniar ree b́en rliiladx ree Jesucrist. Abi' ree b́en Italia rugajpdioz reeman lëjt.

²⁵Dios güünle' gradi. Amén